
Naturalium rerum accurata peruestigatio, qua nostris potissimum temporibus multi occupati sunt, non potest profecto non ingenuo cuius et liberali homini dignissima videri, cui summa opera, summumque studium adhibeatur, quippe quae, etsi nonnunquam iis, qui nouis experimentis vel dubium quoddam diluere, vel magis confirmare verum sibi proposuerant, perniciosi fuerit, in vniuersum tamen per multa et praeclara nobis praestiterit commoda; nam, vt vno verbo omnia complectar, diuinarum, humanarumque scientiarum incrementa repetitis scrutatorum naturae laboribus admodum promota sunt. Posset quidem facile haec ipsa res variis, iisque idoneis exemplis vberius illustrari; veruntamen quum iam alii hoc argumentum sibi explicandum sumserint, eosque fructus, qui ex naturae studio in nos redundarunt, accurate descripserint, superuacaneam prorsus repetitam huius rei pertractationem censeo. Quare potius animo mihi proposui, hac scribendi opportunitate oblata, obseruationes nonnullas recensere, quas mihi nuper naturalia quaedam corpora, eorumque ad alia relationes inuestiganti facere contigit. Etsi vero, vt ingenue profitear, hisce veluti symbolis, quae ad chemiam proxime spectant, non augebitur valde, quam habemus de naturalibus rebus, cognitio, haud prorsus tamen eae inanes et superfluae ab harum rerum peritis iudicabuntur, quae, opinor, explicandis quibusdam phaenomenis aptae futurae sint. Referam autem hac occasione potissimum de nonnullis cum auro et hydrargyro institutis tentaminibus, ea, quae in aliis quibusdam naturalibus corporibus expertus sum, ad aliud mihi tempus seruaturus.